

歡作檳榔花儂作扶留葉欲得兩成日花葉長相接又云贈子檳榔花雜以相思葉二物合成日有如郎與妾相思樹其葉可食而薑亦名相思葉云

藍園

藍園去縣南數里多種藍草可製靛白洋靛入廉而藍始衰

甜柚

甜柚多產總江村以肉脚似淡燕支者爲佳移植他處則味變中秋佳節人多購之對月剝擘謂之剝苦癩

荔支

武利羣山多產荔種類不一曰黑葉曰丫髻曰綠蘿曰大造正鳳黑葉亦曰金奴子實大核小昔人解金釵而得其種此

上品也丫髻形最小生皆並蒂故曰丫髻多無核即有亦小俗呼爲焦核東坡詩曰啖荔支三百顆不妨長作嶺南人

龍眼

廉州果產以龍眼爲最著每花放時市客徧行鄉落間熟視其花可知結果之多寡即付值買之及果熟則雇婦女碎殼去核曝肉乾其肉可爲藥蘇子瞻云廉州龍眼色味殊絕可敵荔支其詩曰香割蜜脾知味勝價輕魚目爲生多

狗兒花

郡中有異草花小而紅兒童採折作犬聲就花呼之即有小蟲自花瓣出黑似小犬故呼爲狗兒花

筋竹

筋竹葉小多刺叢生箐密惟合浦產之鄉人植之以爲籬落
有如牆垣謂之竹根營多年竹生實可取以爲粥

珠官脞錄卷九

許瑞棠輯著

金

金出大龍墟

距城五里

昔有人集股於此淘採以辦法不善致

虧本常樂石康等處亦皆有之土人掘泥淘取日得銀一二毫
不等距乾體北一里許有一林相傳亦產金明末禁止淘採
故此地名曰禁山

煤

自珠江團至永安團一帶之嶺盛產煤土人輒於山坑中拾
以供爨清光緒二十三年嘗有公司集資六十萬兩開採石
頭埠煤礦以礦苗不佳淺掘即止

鐵

邑中鐵產頗饒公館有鐵山

距城東一百三十里

土人用舊法採掘資

本少獲利微北塞張黃等處自採生鐵鑄釜足供全縣之用其餘各嶺多屬鐵鑛惟未經勘測知之不悉

錫

錫產大廉山而常樂等處所出響錫亦著名

水晶玻璃

進城團各山嶺中多有水晶附城等處亦產石英爲製造玻璃之好原料

石

仙人橋

距城東八十五里

有特異礦石未經勘驗不悉何種礦苗

狼人

狼人居合浦縣西北大山中男女俱挽髻前銳後廣以白布覆之績麻爲衣經年積垢不一洗滌獵山而食孩童能騎犬引弓射雉逐兔生長粵西沿邊前明成化間應募爲狼兵粵東始有此種類善卜雞法取生雄雞折一翼向東去毛肉視雞骨紋路之明暗卜吉凶明則吉暗則凶以定向往性饕餮毛血腥穢啖之立盡不以爲嫌有熟狼居瓦屋務耕種常出山市貨與民交易無敢作惡者歸德圖有狼田乃明韓襄毅公征大藤峽調赴合浦防禦山隘即令且耕且守故其後裔猶世承其業雖精悍遜於祖風然果於趨事有足多者

舊志

山子

山子無版籍定居散處合浦欽州諸大谷間男女黎黑徒跣
砍山種畚視地利盡輔徙去善制虎塗毒藥鏃中射虎立斃
婦女短裙及膝坐則兩膝齊跪以爲禮夫婦交歡就山僻處
插青於路以斷行人誤觸之遂彎弓相向然足不敢涉城市
最畏見官長深林中瞰有戴紅帽者輒避去招之則疾走如
飛莫能追躡

舊志

夷人

合浦別有夷人名高梁人不事耕稼以入海捕魚爲業初春
往往射翡翠於鴉州謂之拾翠

黃志

四民

合浦有四民一曰客戶居城郭解漢音業商賈一曰東人雜

居鄉村解閩語業耕種一曰俚人深居遠村不解漢語惟耕墾爲活一曰蛋戶舟居穴處亦能漢音以採海爲生性儉樸詞訟簡希

大清一統志

蛋戶其來不可考有謂秦使尉屠睢統五軍監祿殺西甌王越人皆入叢薄中莫肯爲秦意即其遺民以舟楫爲宅捕魚爲業辨水色則知有龍昔時有稱爲龍戶齊民則曰爲蛋家土人不與結婚不許陸居洪武初編戶立里長屬河泊所歲收魚課今北海多此族

按蛋戶近來生齒日繁漸與居民同化間有與土著通婚姻者

獠族

武刀西村有獠族漁而不耕其言語則合浦土話惟重鼻音
稱爲獠話廉中土著或即其種歟

珠官脞錄卷十

許瑞棠輯著

花雨師

西場花雨師某清道光間學道能祈雨會天旱某郡守召禱雨雨果獲聞於大吏榮以衣冠稱爲雨師

改惡報

廉州合浦南康墟有宰豕爲生者日於臨宰時見豕之畏就刀斧大聲呼號心起不忍恒欲棄而不爲然他業未能一家八口舍此無以爲養強而行之迨後子已成童令學別技得藉餬口即放下屠刀茹素誦經聞雷聲起雖至嗜嘉餽必輟箸漱口跪誦雷經俟雷收聲而止如是者八九年未嘗稍懈